

# Nihánj me 'o yanj cartá qui'yaj sí cu'naj Juan ca'néé so' rihaan nij yuvii noco' man Diose a

Nana nihánj taj xna'anj se vaa cataj  
xna'anj sí cu'naj Juan che'é se  
vaa quene'en rihaan ma'an so' a

**1** Dan me se núj me se cataj  
xna'anj núj rihaan nij soj che'é  
'o sí cane gaa naá asij guun che'e  
Diose qui'yaj Diose chumii, ne inanj  
se vaa cuno ma'an núj do', se vaa  
quene'en rihaan ma'an núj do', se  
vaa cuta' núj ra'a núj xráa do', che'é  
inanj rasuun vaa danj cataj xna'anj  
núj rihaan soj a. Dan me se cataj  
xna'anj núj che'é se-nana Diose, ne  
so' me sí qui'yaj cayáan ní' ga Diose  
nu' cavii nu' ca'anj adonj. <sup>2</sup>Dan me  
se so' me sí qui'yaj cayáan ní' ga  
Diose nu' cavii nu' ca'anj, ne ca'na'  
so', ne quene'en núj man so', ne  
nihánj me se nata' núj rihaan nij soj  
che'é so' se vaa asino canicun' so'  
ga Diose rej yanj Diose gaa naá, gaa  
ne yaj me se ca'na' so' rej ne ní' a.  
<sup>3</sup>Dan me se nata' núj rihaan ma'an  
nij soj che'é se vaa quene'en núj do',  
che'é se vaa cuno núj do', che'é rej  
ca'vee cunu rcua'aan soj ga núj, ne  
dan me se cunu rcua'aan ní' ga Rej  
ní' Diose, ga ta'ní so' Jesucristó a.

<sup>4</sup>Ne achrón núj nana nihánj rihaan  
yanj nayaá soj, che'é rej ca'vee  
guun niha' uxrá rá taran' ní' adonj.

Nana nihánj taj xna'anj se vaa  
ase vaa ya'an chuguun ro', danj  
vaa Diose, ne ca'vee cunu  
sa' nimán ní' qui'yaj so' a

<sup>5</sup>Ne nihánj ro', me nana cataj  
xna'anj Jesucristó cuno núj, ne nata'  
núj nana nihánj rihaan soj, ne dan  
me se ase vaa 'o ya'an chuguun vaa  
Diose, ne rej vaj Diose me se nuvi'  
rej rmi' rej vaj so' ma'. <sup>6</sup>Che'é dan  
sese cataj ní' se vaa sij chéé ga Diose  
me ní', ne sese chéé ní' rej rmi',  
gaa ne tu'va rma'an ní' vaa gaa  
nanj ei. Ne ne noco' ní' tucuáan  
ya yo' gaa a ma'. <sup>7</sup>Tzaj ne sese chéé  
ní' rej chuguun sa' rej vaj ma'an  
Diose, ne ve'é sa' mán taran' ní', ne  
quinavij nu' cacun' tumé ní', qui'yaj  
Jesucristó sí cavi' che'é ní', ne yo'o  
cunu sa' nimán ní' ei. <sup>8</sup>Dan me se  
sese cataj ní' se vaa a doj cacun' ne  
tumé ní', ne dan me se tiha' yu'unj  
ní' vaa gaa nanj adonj. Ne nuveé  
sij a'mii nana ya me ní' gaa a ma'.  
<sup>9</sup>Tzaj ne sese nata' ya ní' rihaan

Diose che'é cacun' tumé ní', ne Diose me se vaa che'é gaa nucuaj rá ní' se vaa nica qui'yaj so' che'é ní', ne dan me se cataj so' se vaa navij cacun' tumé ní', ne tinavij so' nu' se chi'ij man nimán ní' adonj. <sup>10</sup>Dan me se sese cataj ní' se vaa a doj ne qui'yaj ní' cacun', ne sij tu'va rma'an me ní', ne 'yaj ní' sí' ne man ndaa ma'an Diose vaa gaa nanj chuguanj. Dan me se aj cataj ya Diose se vaa tumé ní' cacun' nanj ei. Ne sese ca'mij ní' danj, ne nuveé sij uno se-nana Diose me ní' gaa mei.

**Nana nihánj taj xna'anj che'é nana no xcuún ní' cunō ní' a**

**2** Ase vaa ta'níí 'unj ro', danj vaa soj, tinuj, nocoj. Ne achrón 'unj nu' nana nihánj rihaan yanj nihánj, che'é rej se qui'yaj soj cacun' mei.

Dan me se sese qui'yaj ní' cacun', ne vaa 'o sí' nica nimán a'mii yu'unj che'é ní' rihaan Rej ní' Diose, ne Jesucristó me sí' a'mii yu'unj che'é ní' ei. <sup>2</sup>Ne so' me sí' cavi' che'é rej ca'vee quinavij cacun' tumé ní' adonj. Tzaj ne nuveé che'e doj se-cacun' ní' me cavi' so' ma'. Cavi' so' che'é cacun' tumé cunudanj nij yuvij man rihaan chumij adonj.

<sup>3</sup>Dan me se nihánj me rej ne'en ní' se vaa sij noco' man Jesucristó me ní' a. Dan me se sese 'yaj ní' ndaa vaa cataj xna'anj Jesucristó rihaan ní', ne sij noco' ya man so' me ní' adonj. <sup>4</sup>Tzaj ne sese taj yo'o so' se vaa sij noco' man Jesucristó me so' ne ne 'yaj so' ndaa vaa cataj xna'anj Jesucristó rihaan ní', ne sí' ne me so', ne nuveé sij a'mii nana ya

me so' mei. <sup>5</sup>Tzaj ne sí' uno se-nana Jesucristó ro', so' me sí' ya ya aráj cochroj rihaan Diose chuguanj. Che'é dan, sese qui'yaj ní' danj, ne ca'vee guun ya rá ní' se vaa sij noco' man Jesucristó me ní' ei. <sup>6</sup>Ne sí' taj se vaa yo'o noco' man Jesucristó ro', ase vaa qui'yaj Jesucristó ro', danj inanjanó xcuún so' qui'yaj ma'an so' uún adonj.

<sup>7</sup>Dan me se 'ee raj man soj, tinuj, nocoj. Ne nihánj me se cachron 'unj 'o nana naca rihaan yanj nihánj cunō soj chuguanj. Tzaj ne nuveé nana naca me nana nihánj ma'. Veé nana cuno soj asij guun che'e soj canoco' soj man Jesucristó me nana nihánj nanj adonj. <sup>8</sup>Dan me se cachron uún 'unj nana naca nihánj cunō soj, ne ya ya nana naca tucu'yón Jesucristó me nana nihánj, ne cuno soj nana naca nihánj adonj. 'O se vaj navij rej rmi' rihaan chumij nihánj, ne Jesucristó ro', me ya'an chuguun, ne dan me se guun che'e se-nana so' cuchuguun se-nana so' rihaan chumij nihánj ei. <sup>9</sup>Ne xa' sí' taj se vaa vaj so' rej chuguun ga se-nana Jesucristó ne nachri' so' ni'yaj so' man tinúu so', ne sij vaj guee rej rmi' me ya so' nanj chuguanj. <sup>10</sup>Ne sí' 'ee rá man tinúu me se so' me sí' chéé rej chuguun ga se-nana Jesucristó, ne se ca'vee quirí' so' ma'. <sup>11</sup>Ne xa' sí' nachri' man tinúu, tzaj ne so' me sí' vaj rej rmi', ne 'o chéé guee so' rej rmi' nanj á. Ne ne'en so' me rej vaj so' a ma'. 'O se caráan rihaan so', qui'yaj rej rmi' vaj so' nanj adonj. Na'vee a doj xcaj so' cuentá a ma'.

<sup>12</sup>Dan me se achrón 'unj nu' nana nihánj nayaaj soj xnij, ne 'o se che'é

se noco' soj man Jesucristó ro', che'é dan quinavij cacun' tumé soj rihaan Diose ei.

<sup>13</sup>Achrón 'un̄j nu' nana nihánj nayaa soj sij vaa ta'níí, ne 'o se aj ne'en soj man síí cayáán ga Diose gaa guun che'e Diose qui'yaj Diose chumii nihánj a.

Achrón 'un̄j nu' nana nihánj nayaa soj sij tachruu, ne 'o se aj qui'yaj canaán soj rihaan síí chree ei.

<sup>14</sup>Achrón 'un̄j nu' nana nihánj nayaa soj xnii, ne 'o se aj ne'en soj man Rej ní' Diose adonj.

Achrón 'un̄j nu' nana nihánj nayaa soj sij vaa ta'níí, ne 'o se aj ne'en soj man síí cayáán ga Diose gaa guun che'e Diose qui'yaj Diose chumii nihánj ei.

Achrón 'un̄j nu' nana nihánj nayaa soj sij tachruu, ne 'o nucuaj ndo'o nimán soj rihaan sayuun, ne yo' uno soj se-nana Diose, ne aj qui'yaj canaán soj rihaan síí chree ei.

<sup>15</sup>Se guun rá soj ni'yaj soj chumii nihánj do', nij rasuun man rihaan chumii nihánj do' mei. 'O se xa' síí me rá ni'yaj chumii nihánj, tzaj ne nuveé sij aráj cochroj rihaan Rej ní' Diose me so' man chuguanj.

<sup>16</sup>'O se rihaan chumii nihánj vaa ndo'o se me rá yuvii qui'yaj yuvii do', vaa ndo'o se me rá yuvii ni'yaj yuvii do', vaa ndo'o rasuun 'yaj uun xta' nimán yuvii do', tzaj ne nuveé rasuun cavii rihaan Rej ní' Diose me nu' nij rasuun vaa danj ma'. 'O se nanj rasuun man rihaan chumii nihánj me nij rasuun yo' nanj adonj.

<sup>17</sup>Ne vaj navij chumii nihánj ei. Ne vaj navij nu' se vaa me rá nij yuvii man rihaan chumii nihánj qui'yaj nij so' ei. Tzaj ne síí 'yaj ndaa vaa

me rá Diose me se cayáán so' nu' cavii nu' ca'anj ga Diose chuguanj.

Nana nihánj taj xna'anj che'é síí tu'va rma'an se vaa sij tinanii man yuvii rihaan sayuun me so' a

<sup>18</sup>Dan me se ase vaa ta'níj vaa soj, ne me raj cuno soj nana nihánj ei.

'O se nichrun' quinavij chumii nihánj, ne aj cuno soj nana se vaa ca'na' 'o síí quitaj yu'unj, ne cataj so' se vaa sij ca'née Diose tinanii man yuvii rihaan sayuun me so', ne nihánj me se aj ca'na' que'ee síí tu'va danj, ne che'é dan ne'en ya ní' se vaa ya nichrun' quinavij chumii nihánj ei. <sup>19</sup>Dan me se ase vaa tinúú ní' vaa nij so' asij rque, tzaj ne ca'anj yanij nij so' rihaan ní', ne nuveé ya ya tinuj ní' me nij so' a ma'. 'O se ca'anj yanij nij so' rihaan ní' che'é rej ca'vee xcaj ní' cuentá se vaa nuveé tinuj ní' me taran' nij so' a man adonj.

<sup>20</sup>Ne xa' soj, tzaj ne cune' Diose man soj, ne guun nucuaj soj xcaj soj cuentá, qui'yaj Diose, ne ne'en soj cunudanj rasuun ei. <sup>21</sup>Nuveé che'e se ne ne'en soj nana ya me cachrón 'un̄j nana nihánj nayaa soj ma'. Tzaj ne achrón 'un̄j nana nihánj nayaa soj che'é se sij ne'en nij nana ya me soj, ne aj ne'en soj se vaa ino doj vaa nana ne ga nana ya nana noco' ní' adonj.

<sup>22</sup>Ne síí ne me se so' me síí taj se vaa nuveé sij ca'née Diose tinanii man yuvii rihaan sayuun me Jesucristó chuguanj. Dan me se taj so' se vaa ma'an so' me Cristó ca'née Diose, taj so' chuguanj. Ne dan me se ne aráj cochroj so' rihaan Rej ní' Diose do', rihaan ta'níí Diose

do' ma'. <sup>23</sup>Dan me se xa' sí ne aráj cochroj rihaan ta'ní Diose, tzaj ne sij ne noco' man Rej ní' Diose me so' ei. Tzaj ne sí nata' ya se vaa ve'é noco' so' man ta'ní Diose ro', so' me sí noco' ya man Rej ní' Diose uún adonj.

<sup>24</sup>Ne xa' soj, tzaj ne yo'o cunō soj nana cunō soj gaa guun che'e soj canoco' soj man Jesucristó ei. Sese qui'yaj soj danj, ne sij noco' man ta'ní Diose do', man ma'an ya Rej ní' Diose do', me soj chuguanj. <sup>25</sup>Ne nihánj me nana cata' tu'va ma'an Jesucristó rihaan ní', se vaa ca'vee cayáán ní' ga Diose nu' cavii nu' ca'anj ya ei.

<sup>26</sup>Dan me se cachrón 'unj nu' nana nihánj nayaa soj che'é rej xcaj soj cuentá che'é nij sí me rá tihá' yu'unj man soj adonj. <sup>27</sup>Ne xa' soj, tzaj ne che'é se cune' Diose man soj ro', che'é dan yo'o noco' soj man Diose, ne taj che'é tucu'yón nii doj nana man soj a ma'. Tananj che'é se cune' Diose man soj, che'é dan aj nari' soj nana che'é nu' rasuun, ne inanj nana ya nari' soj ei. Nuveé nana ne me nana nari' soj, qui'yaj Diose ma'. Dan me se yo'o noco' soj man Diose, ndaa vaa tucu'yón ya so' man soj adonj.

**Nana nihánj taj xna'anj se  
vaa ta'nij Diose me ní' a**

<sup>28</sup>Dan me se ase vaa ta'nij vaa nij soj rihanj, ne me rá 'unj se vaa yo'o canoco' raan soj man Jesucristó, che'é rej asa' ca'na' uún so' rihaan chumii nihánj, ne se guun na'aj soj a doj ma'. Tananj guun niha' rá soj ca'mii soj ga so' ei. <sup>29</sup>Dan me se ne'en soj se vaa sí sa' inanj me

Jesucristó, ne che'é dan ne'en soj se vaa nu' nij sí 'yaj sa' ro', taran' nij so' me sí cunuu sa' nimán qui'yaj so' adonj.

**3** Dan me se xcaj soj cuentá se vaa cunuu 'ee uxrá rá Rej ní' Diose ni'yaj so' man ní', ne ndaa ta'ní Diose guun ní', qui'yaj Diose chuguanj. Ne ta'nij Diose me xa' ní' adonj. Che'é dan ne ne'en nij sí man rihaan chumii nihánj man ní' daj sij me ní' man chuguanj. 'O se tananj uún, ne ne ne'en nij so' man ma'an Diose uún a man adonj. <sup>2</sup>Dan me se 'ee raj man nij soj, tinuj, nocoj, ne cuano nihánj me se ta'nij Diose me ní', ne ataa xcaj ní' cuentá daj sij guun ní' qui'yaj Diose vaa güii ei. Maan se ne'en ní' se vaa asa' ca'na' so', ne ase vaa so' ro', danj gaa ma'an ní' uún adonj. 'O se quene'en ní' man so', ne xcaj ya ní' cuentá daj vaa xa' so' nanj adonj.

<sup>3</sup>Ne nij sí nucuaj rá man nana nihánj se vaa ya vaa nana nihánj me se ya cunuu sa' nimán nij so' qui'yaj nij so', ne ase vaa sa' nimán Jesucristó ro', danj gaa sa' nimán nij so' uún adonj.

<sup>4</sup>Dan me se nu' nij sí 'yaj cacun' ro', nij so' me nij sí na'vej rá cunō rihaan Diose, <sup>5</sup>ne ne'en nij soj se vaa ca'na' Jesucristó rihaan chumii nihánj, che'é rej ca'vee tinavij so' cacun' tumé yuvii, ne a doj cacun' taj tumé so' ma'. <sup>6</sup>Ne taran' nij sí yo'o noco' man so' ro', ne 'yaj nij so' cacun' ma'. Ne nij sí noco' tucuaán 'yaj cacun' ro', nuveé sij ne'en man Jesucristó me nij so' man adonj.

<sup>7</sup>Dan me se ase vaa ta'nij vaa soj rihanj, tinuj, nocoj, ne se guun tihá' yu'unj a doj yuvii man soj

man chuguanj. Sí 'yaj sa' ro', sí sa' me so', ne ase vaa ma'an Jesucristó vaa so' adonj. <sup>8</sup>Ne sí 'yaj cacun' me se sí noco' se-tucuanj sí chree me so' ei. 'O se asij guun che'e Diose qui'yaj Diose chumií nihánj, ne sij 'yaj inanj cacun' me sí chree nanj adonj. Ne ca'na' ta'níí Diose rihaan chumií nihánj, che'é rej ca'vee tiri' so' nu' se vaa 'yaj sí chree yo' ei. <sup>9</sup>Ne taran' nij sí cunuu sa' nimán qui'yaj Diose ro', ne 'yaj nij so' cacun' a ma'. 'O se Diose me sí qui'yaj cunuu sa' nimán nij so', ne se ca'vee yo'o qui'yaj so' cacun', ése ma'an Diose qui'yaj ca'ngaa naca nij so' nanj adonj. <sup>10</sup>Ne nihánj me xcaj ní' cuentá ni'yaj ní', gaa ne cunuu yaan ní' ta'níí Diose do', ta'níí sí chree do' ei. Dan me se nij sí ne 'yaj se sa' ro', nuveé sij noco' man Diose me nij so' ma'. Dan me se nuveé sij 'ee rá man tinúú me nij so' a man adonj.

**Nana nihánj taj xna'anj se  
vaa no xcuún ní' cunuu 'ee  
rá ní' man tuvi' ní' a**

<sup>11</sup>O se nana nihánj me nana cuno soj asij guun che'e soj canoco' soj man Diose, ne nana nihánj taj se vaa no xcuún ní' cunuu 'ee rá ní' man tuvi' ní' chuguanj. <sup>12</sup>Dan me se se qui'yaj ní' ndaa vaa qui'yaj sí cu'naj Caín gaa naá ma'. 'O se sij noco' tucuaán chi'ii me so', ne ticavi' so' tinúú so' adonj. Ne me che'é qui'yaj so' danj, rá soj ga. 'O se nu' rasuun qui'yaj so' me se inanj chi'ii ndo'o qui'yaj ma'an so', ne tinúú so' me se sa' inanj vaa rasuun qui'yaj tinúú so', ne che'é dan guun xcoj ruvaa rá so' ni'yaj so' tinúú so' adonj.

<sup>13</sup>Dan me se se ca'anj rá soj sese quitaj ri'yunj nij sí man rihaan chumií nihánj ni'yaj nij so' man soj, man tinuj, man nocoj. <sup>14</sup>O se che'é se cunuu 'ee rá ní' man tinúú ní' ro', che'é dan ne'en ní' se vaa aj tanáj xco ní' chrej chi'ii chrej qui'yaj cavi' ní', ne aj cunuu sa' nimán ní', ne ca'vee cayáán ní' ga Diose ei. Ne sí ne 'ee rá man tuvi' me se adi' se vaa nij sí cavi' ro', vaa nij so' nanj adonj. <sup>15</sup>Dan me se xa' taran' nij sí nachri' ni'yaj man tinúú me se ase vaa sí ticavi' man tinúú ro', vaa nij so', ne ne'en soj se vaa daj chihaa mij se ca'vee gaa i'na' sí vaa danj rihaan Diose nu' cavii nu' ca'anj ma'. <sup>16</sup>Ne Jesucristó ro', me sí ca'vej rá cavi' che'é ní', ne che'é dan ne'en ní' se vaa 'ee rá so' man ní' adonj. Ne che'é dan no xcuún ní' ca'nej nimán ní' cavi' ní' che'é tinúú ní' chuguanj.

<sup>17</sup>Dan me se sese vaa ndo'o rasuun man rihaan chumií nihánj nıcaj yo'o so', ne nda' se ne'en so' se vaa achiin ndo'o rasuun man tinúú so' tzaj ne na'vej rá so' racuj so' man tinúú so', ne nuveé sij aráj cochroj rihaan Diose me so' a man adonj. <sup>18</sup>Dan me se ase vaa ta'nij vaa soj chuguanj. Dan me se se guun cataj uun ní' nana uun se vaa aráj cochroj ní' rihaan Diose chuguanj. Qui'yaj ya ya ní' se sa' ndaa vaa me rá Diose qui'yaj ní', ne ya ya sij aráj cochroj rihaan Diose me ní' adonj.

**Nana nihánj taj xna'anj  
se vaa taj che'é guun na'aj  
ní' ni'yaj ní' Diose ma'**

<sup>19</sup>Dan me se sese qui'yaj ní' danj, ne quene'en ní' se vaa sij noco' ya nana ya me ní', ne dan me se guun ya ya rá nimán ní' rihaan Diose ei.

<sup>20</sup>Q se nda' se ca'vee quinano rá ní' che'é cacun' tumé ní', tzaj ne sa' doj vaa Diose rihaan nimán ní', ne Diose me sí' ne'en cunudanj adonj. <sup>21</sup>Dan me se 'ee raj man nij soj, tinuj, nocoj. Ne sese nuvi' cacun' tumé ní', ne se cuchu'vi' ní' ca'mii ní' ga Diose ma'. <sup>22</sup>Dan me se me ma'an rasuun cachinj ní' rihaan Diose, ne rque Diose cunudanj se vaa cachinj ni'yaj ní' rihaan so', che'é se sij uno se-nana so' me ní', ne uun niha' rá so' ni'yaj so' se sa' 'yaj ní' ei. <sup>23</sup>Dan me se nihánj me se vaa me rá Diose qui'yaj ní' a. Me rá Diose cuchuman rá ní' ni'yaj ní' man ta'níi so' Jesucristó, ne me rá Diose cunuu 'ee rá ní' ni'yaj ní' man tuvi' ní' ndaa vaa ca'ne' Diose suun rihaan ní' a. <sup>24</sup>Ne sí' uno se-nana Diose ro', so' me sí' yo'o noco' man Diose, ne yo'o ne Diose ga so' adonj. Ne nihánj me rej ne'en ní' se vaa yo'o ne Diose ga ní' ei. Che'é se xcay ní' cuentá se vaa 'yaj suun Nimán Diose nimán ní', che'é dan ne'en ní' se vaa ne Diose ga ní' adonj.

**Nana nihánj taj xna'anj me nana ca'vee cunó ní' a**

**4** 'Ee raj man nij soj, tinuj, nocoj. Ne se guun cunó soj me ma'an nana ma'. Asino xcay soj cuentá sese nana rqué Nimán Diose me nana ca'mii yo'o so', ne sese Nimán Diose me sí' rqué nana yo', ne ca'vee cunó soj nana yo' ei. 'Q se aj ca'na' ndo'o sí' ne, ne taj nij so' se vaa sij nata' se-nana Diose me nij so', tzaj ne tu'va rma'an nij so' nanj ei. Dan me se danj tu'va nij so' rihaan nij sí' man rihaan

chumií nihánj che'é se me rá nij so' cuchuman rá nij sí' man rihaan chumií nihánj chuguanj. <sup>2</sup>Tzaj ne nihánj me se vaa qui'yaj soj, ga ne ca'vee xcay soj cuentá me nana me nana ca'mii Nimán Diose ei. Sese cataj yo'o so' se vaa Jesucristó me sí' ca'née Diose tinanii man yuvii rihaan sayuun, ne guun Jesucristó yuvii ca'na' so', cataj yo'o so', ne nana yo' me se-nana Nimán Diose adonj. <sup>3</sup>Tzaj ne nu' nij sí' taj se vaa nuveé sij ca'née Diose man me Jesucristó me se nuveé nana rqué Nimán Diose me yo' ma'. 'Q se se-nana nij sí' ne tu'va rma'an me yo', ne dan me se aj cunó soj se vaa ca'na' nij so', ne cataj nij so' se vaa sij ca'née Diose tinanii man yuvii rihaan sayuun me ma'an nij so' ei. Ne yaj nihánj me se aj man ndo'o nij so' rihaan chumií nihánj yaj cuano chuguanj.

<sup>4</sup>Tzaj ne yaj nihánj me se sí' cunuu sa' nimán qui'yaj Diose me nij soj, tinuj, nocoj. Ne aj qui'yaj canaan soj rihaan nij sí' ne cuano ei. 'Q se nuu Nimán Diose nimán soj, ne nucuaj doj Nimán Diose rihaan sí' chree vaj rihaan chumií nihánj chuguanj. <sup>5</sup>Ne nij sí' ne yo', tzaj ne sí' man rihaan chumií nihánj me nij so', ne che'é dan inanjan a'mii nij so' ndaa vaa nari' nij so' rihaan chumií nihánj, ne uno nij sí' man rihaan chumií nihánj se-nana nij so' ei. <sup>6</sup>Tzaj ne sí' cunuu sa' nimán qui'yaj Diose me ní', ne nij sí' ne'en man Diose ro', uno nij so' se-nana ní' adonj. Ne xa' sí' ne cunuu sa' nimán qui'yaj Diose, tzaj ne ne uno nij so' se-nana ní' a ma'. Che'é dan ne'en ní' me sí'

nuu Nimán Diose nimán, ne ne'en ní' me síi nuu nana tiha' yu'unj nimán chuguanj.

Nana nihánj taj xna'anj se vaa no xcúún ní' cunuú 'ee rá ní' man tuvi' ní', che'é se 'ee rá Diose man ní' a

<sup>7</sup>'Ee raj man nij soj, tinuj, nocoj. Ne no xcúún ní' cunuú 'ee rá ní' man tuvi' ní' adonj. 'O se Diose me síi rqué rej nucuaj rihaan ní' cunuú 'ee rá ní' man tuvi' ní' a. Che'é dan nu' síi 'ee rá man tuvi' me se síi cunuú sa' nimán qui'yaj Diose me nij so' adonj. Ne ne'en nij so' man Diose adonj. <sup>8</sup>Ne síi ne 'ee rá man tuvi' me se ataa xcáj nij so' cuentá che'é Diose ei. 'O se ataa xcáj nij so' cuentá se vaa Diose me síi 'ee inanj rá man ní' adonj. <sup>9</sup>Ne nihánj me cataj xna'anj 'unj rihaan soj me che'é ne'en ní' se vaa 'ee rá Diose man ní' a. Dan me se ndá' se orún' ya ta'níi Diose, tzaj ne ca'née Diose man ta'níi ma'an ya Diose rihaan chumií nihánj, che'é rej ca'vee gaa i'na' nimán ní' nu' cavii nu' ca'anj qui'yaj so' a. <sup>10</sup>Ne vaa che'é xcáj ní' cuentá se vaa ne caraá cochroj ní' rihaan Diose asino yaan ma'. Tananj asino yaan me se cunuú 'ee rá Diose ni'yaj Diose man ní', gaa ne ca'née so' man ta'níi so' che'é rej cavi' ta'níi so' ne tinavij ta'níi so' cacun' tumé ní' a. <sup>11</sup>Ne che'é se cunuú 'ee rá Diose man ní' ro', che'é dan no xcúún ní' cunuú 'ee rá ní' man tuvi' ní', tinuj, nocoj. <sup>12</sup>A doj yuvií ne quene'en rihaan man Diose nu' cavii nu' ca'na' ma'. Tzaj ne sese gaa 'ee rá ní' man tuvi' ní', ne ya ne Diose ga ní', ne aj cunuú sa' nimán ní' ndaa vaa guun

rá Diose gaa cunuú 'ee rá Diose man ní' a.

<sup>13</sup>Dan me se che'é se rqué Diose Nimán Diose rihaan ní' ro', che'é dan ne'en ní' se vaa sij noco' man Diose me ní' ne yo'o ne so' nimán ní' a. <sup>14</sup>Ne aj ne'en núj se vaa ca'née Rej ní' Diose man ta'níi so' rihaan chumií nihánj che'é rej tjanii so' man nij síi man rihaan chumií nihánj rihaan sayuun, ne aj nata' núj nana yo' rihaan yuvií ei. <sup>15</sup>Ne síi taj rihaan tuvi' se vaa ta'níi Diose me Jesucristó ro', so' me síi 'o noco' man Diose, ne 'o ne Diose ga so' chuguanj. <sup>16</sup>Ne aj ne'en núj se vaa 'ee rá Diose man ní', ne amán rá núj se vaa 'ee rá so' man ní' ei.

Diose me síi 'ee rá man ní' ei. Ne sij 'o 'ee rá man tuvi' ro', so' me síi 'o noco' man Diose, ne 'o ne Diose ga so' ei. <sup>17</sup>Ne che'é dan sese 'ee rá ní' man tuvi' ní', ne asa' quisíj güii ca'ne' Diose cacun' che'é yuvií, ne se chuchu'vi' ní' ma'. 'O se quene'en ní' se vaa ase vaa qui'yaj Jesucristó gaa vaj so' rihaan chumií nihánj ro', danj qui'yaj ma'an ní' uún adonj. <sup>18</sup>Che'é dan síi ya ya 'ee rá man tuvi' ro', a doj ne chu'vi' so' ma'. Síi chu'vi' me síi uun rá se vaa qui'yaj Diose sayuun man so', ne nuveé sij ya ya 'ee rá man tuvi' me síi guun danj rá ma'. <sup>19</sup>Dan me se 'ee rá ní' man tuvi' ní' che'é se asino cunuú 'ee rá ma'an Diose man ní' a. <sup>20</sup>Ne sese cataj yo'o so' se vaa aráj cochroj so' rihaan Diose, ne sese nachri' so' ni'yaj so' tinúú so', ne síi ne me so' ei. 'O se sese ruvi' ya tinúú so' ni'yaj so' tzaj ne ne 'ee rá so' man tinúú so', ne asa' ca'vee caraá cochroj so' rihaan Diose,

sese ne ruvi' Diose nilyaj so' ga.  
 2<sup>1</sup> Ne nihánj me nana cataj xna'anj  
 Jesucristó rihaan ní', ne cataj so' se  
 vaa sí aráj cochroj rihaan Diose ro',  
 no xcúun so' gaa 'ee rá so' man tuvi'  
 so' uún adonj, taj Jesucristó a.

**5** Cunudanj nij sí amán rá se  
 vaa me Jesucristó sí ca'née  
 Diose tinanii man yuvii rihaan  
 sayuun ro', aj cunuu sa' nimán  
 nij so', qui'yaj Diose chuguanj.  
 Ne che'é dan sese aráj cochroj  
 ní' rihaan Diose, ne no xcúun ní'  
 gaa 'ee rá ní' man nij sí cunuu sa'  
 nimán yo' ei. 2<sup>2</sup> Ne sese aráj cochroj  
 ní' rihaan Diose, ne sese uno ní'  
 nana cataj xna'anj Diose rihaan ní',  
 ne veé sí aráj cochroj rihaan ta'níí  
 Diose me uún ní' adonj. 3<sup>3</sup> Ne sese  
 uno ní' nana cataj xna'anj Diose  
 rihaan ní', ne sij aráj cochroj rihaan  
 Diose me ní' chuguanj.

**Nana nihánj taj xna'anj se vaa  
 sese cuchuman rá ní' nilyaj  
 ní' man Jesucristó, ne qui'yaj  
 canaan ní' rihaan se nij man  
 rihaan chumii nihánj a**

Ne ne sayuun vaa cunó ní' rihaan  
 Diose ma'. 4<sup>1</sup> O se cunudanj nij sí  
 cunuu sa' nimán qui'yaj Diose ro',  
 qui'yaj canaan nij so' rihaan se  
 nij man rihaan chumii nihánj, ne  
 che'é se amán rá ní' nilyaj ní' man  
 Jesucristó ro', che'é dan aj qui'yaj  
 canaan ní' rihaan chumii nihánj  
 nanj ei. 5<sup>5</sup> Dan me se sí amán rá se  
 vaa Jesucristó me ta'níí Diose ro',  
 so' me sí 'yaj canaan rihaan se nij  
 man rihaan chumii nihánj adonj.

6<sup>6</sup> Nihánj me Jesucristó sí ca'na'  
 cata' ne, ne 'o se ne ca'na' so' cata'  
 ne uun so' ma'. Dan me se ca'na'

so' cata' ne so', ne ca'na' so' cavi' so'  
 che'é ní' uún adonj. 'O se Nimán  
 Diose me se taj xna'anj Nimán Diose  
 rihaan ní', ne amán ya rá ní', ése  
 ya uxrá a'mii Nimán Diose adonj.

7<sup>7</sup> O se va'nuj nij rasuun taj xna'anj  
 rihaan ní' che'é Jesucristó ei. 8<sup>8</sup> Dan  
 me se Nimán Diose taj xna'anj  
 rihaan ní' che'é Jesucristó, ne che'é  
 se cata' ne Jesucristó, che'é dan  
 xcaj ní' cuentá che'é so', ne che'é  
 se cavi' Jesucristó, che'é dan xcaj  
 ní' cuentá che'é so', ne cyaan a'mii  
 va'nuj nij rasuun yo' a. 9<sup>9</sup> Dan me  
 se uno ní' nana nata' tuvi' ní' sí  
 man rihaan chumii nihánj rihaan  
 ní', ne che'é dan vaa che'é cunó ní'  
 nana nata' Diose rihaan ní' a. 'O  
 se sa' doj vaa Diose rihaan yuvii,  
 ne nata' so' rihaan ní' che'é ta'níí  
 so' a. 10<sup>10</sup> Dan me se sí amán rá nilyaj  
 man ta'níí Diose ro', so' me sí cunó  
 se-nana Diose a. Tzaj ne sí na'vej  
 rá cuchuman rá se-nana Diose ro',  
 so' me sí uun rá se vaa sí ne me  
 Diose a. 'O se ne cuchuman rá so'  
 nana nata' Diose rihaan so' che'é  
 ta'níí Diose ma'. 11<sup>11</sup> Ne nana nata'  
 Diose rihaan ní' taj se vaa ca'vee  
 cayáan ní' ga Diose nu' cavii nu'  
 ca'anj, qui'yaj Diose, che'é rej cavi'  
 ta'níí Diose che'é ní' a. 12<sup>12</sup> Sí noco'  
 man ta'níí Diose me sí cayáan  
 ga Diose nu' cavii nu' ca'anj ya ei.  
 Tzaj ne sí na'vej rá canoco' man so'  
 taj ma'. Se cayáan so' ga Diose ma'.

**Nana nihánj taj xna'anj se vaa xcaj  
 ní' cuentá se vaa ca'vee cayáan  
 ní' ga Diose nu' cavii nu' ca'anj a**

13<sup>13</sup> Dan me se aj cachronj nana  
 nihánj nayaaj nij soj, che'é rej  
 quene'en soj se vaa cayáan soj ga



Diosē nu' cavii nu' ca'anj, che'é rej me soj sí amán rá ni'yaj man ta'níí Dios̄ ei. <sup>14</sup>Nē cuanō nihánj me se ā doj ne chu'vi' ní' cachin̄j ni'yaj ní' 'o rasuun rihaan Dios̄ ā ma'. 'O se aj ne'en ya ní' se vaa sese ca'vej rá so' n̄icaj ní' rasuun cachín̄ ni'yaj ní' rihaan so', nē rquē so' adonj. <sup>15</sup>Nē che'é se ne'en ní' se vaa cun̄o so' me ma'an nanā cachin̄j ni'yaj ní' rihaan so', che'é dan ne'en ní' se vaa qui'yaj so' ndaa vaa cachin̄j ni'yaj ní' rihaan so' ei.

**Nanā nihánj taj xna'anj  
che'é cacun' a**

<sup>16</sup>Dan me se sese ne'en ní' tinúú ní' 'yaj so' me ma'an cacun', ne cachin̄j ni'yaj ní' che'é so' rihaan Dios̄, nē Dios̄ me sí caraā x'naa che'é cacun' qui'yaj so' adonj. Tzaj nē sese ne'en ní' man tinúú ní' 'yaj so' cacun' noc̄o ndo'o cacun' qui'yaj cavi' nu' so' rihaan Dios̄, nē taj che'é cachin̄j ni'yaj ní' rihaan Dios̄ che'é so' ā ma'. Dan me se vaa cacun' uun, nē vaa cacun' noc̄o ndo'o qui'yaj cavi' nu' ní' rihaan Dios̄ adonj. Tzaj nē che'é cacun' noc̄o yo' me se sē cachín̄ ni'yaj soj mei. <sup>17</sup>Dan

me se me ma'an se nij 'yaj ní' me cacun' chuguanj. Tzaj nē se cavi' nu' ní' rihaan Dios̄ qui'yaj me ma'an cacun' yo' ma'. 'O se ca'vee tinavij Dios̄ cacun' yo' ei.

<sup>18</sup>Dan me se ne'en ní' se vaa nu' nij sí ca'ngaa nimán qui'yaj Dios̄ ro', daj chihaā m̄j ne chéé nij so' xrej sí chree ma'. 'O se tumé ta'níí Dios̄ man nij so', nē se ca'vee qui'yaj chi'ii sí chree man nij so' a. <sup>19</sup>Nē ne'en ní' se vaa sí noco' man Dios̄ me ní' adonj. Tzaj nē cunudan̄j nij yuvī man rihaan chumī nihánj noco' man sí chree ei. <sup>20</sup>Nē ne'en ní' se vaa aj ca'na' ta'níí Dios̄, nē qui'yaj suun so' che'é ní', che'é rej ca'vee xcaj ní' cuentá che'é Dios̄ ya, ne ne'en ní' se vaa me ní' sí noco' man ma'an ya ta'níí so' Jesucristó, nē Jesucristó ro', me ma'an ya Dios̄, nē so' me sí qui'yaj cayáán ní' ga Dios̄ nu' cavii nu' ca'anj adonj.

<sup>21</sup>Ase vaa ta'níj vaa nij soj rihan̄j, tinuj, nocoj. Dan me se cataj 'un̄j rihaan soj, nē cutumé ndo'o soj man soj rihaan ya'an̄j acó̄j yuvī man rihaan chumī nihánj ei. Nē sē guun guun rá soj ni'yaj soj ā 'o rasuun vaa dan̄j ma'.